


TEZAUUR LITURGIC
24 OCTOMBRIE

SLUJBA
SF. CUVIOS
ZOSIMA
VERHOVSKI
DE LA
ZOSIMOV



MOSCOVA, 2000



Служба преподобному Зосиме Верховскому

На малой вечерни

На Господи, воззвах: стихиры на 4, глас 8:

Житие твое явися благочестно, преподобне
Зосимо, / добродетельми украшено, / простотою
и смирением венчаемо, / и ныне ликуеши на
Небесех со Ангелы, / о всех присно моляся, //
творящих память твою.

Нося в руках священное, отче Зосимо,
Евангелие, / сего исполнитель был еси: / имения
родителей отвергся, / и слезами и теснотою все
совершил еси твое житие, преподобне; / темже
утешения Божественнаго и непрестаннаго
веселия // ныне наслаждаешься, преблаженне.

Путешествие изрядное и велетрудное по
пустыням сибирским / приведе тя ко
пристанищу утишному у града Кузнецка, /
идеже себе отверг еси / и в Божественный
одеялся еси образ отбежением всех сластей, /
темже во псалмех и песнях прославим тя, //
пустынниче блаженне Зосимо.

Преподобне отче наш Зосимо, / воистину сна
твоима очима не дал еси, / ниже плоти твоя

упокоения, / Божию силою укрепляемь, /
мысль свою горе возвышая, / над страстями
воцарился еси; / темже попечение о пастве
твоей приял еси / и обители святых основал еси.
/ Моли Христа Бога о нас, // твою память
верою и любовью благочестно совершающих.

Слава, глас 8:

Монахов множества / наставника ты почитаем,
отче наш Зосимо, / твоею бо стезею воистину
право ходити познахом. / Блажен еси, Христу
работав, / и вражью обличил еси силу, / Ангелов
собеседниче, преподобных сопричастниче и
праведных, / с нимиже молися Господеви //
помиловатися душам нашим.

И ныне, Богородичен, глас тойже:

Царь Небесный за человеколюбие на земли явился
/ и с человеки поживе, / от Девы бо Чистыя
плоть приемый / и из нея прошедый с
восприятием, / Един есть Сын, сугуб естеством,
/ но не Ипостасию. / Темже, совершенна Того
Бога / и совершенна Человека воистину
проповедающе, / исповедуем Христа Бога
нашего: / Егоже моли, Мати Безневестная, /
помиловатися душам нашим.

На стиховне стихиры, глас 2.

Подобен: ДOME Евфрафов:

Зосимо Богомудре, / твоя рабы приими /
торжествующия любовью, / преподобне отче
наш, // всесвященную память твою.

Стих: Честна пред Господем / смерть
преподобных Его.

Обрет себе пристанище в сибирских дебрех, /
пустынником древним уподобився, / в
притекших к тебе возжег еси свет Христов. / О
пречудный отче Зосимо, // моли спастися
душам нашим.

Стих: Блажен муж бояйся Господа, / в заповедех
Его восхощет зело.

Приими ныне пение / твоих чад, преподобне, /
радостно торжествующих / в честней твоей
памяти, / Зосимо богомудре, отче наш.

Слава, глас и подобен тойже:

О Господи, / увы нам погибаем, / потопляеми
грехми. / Молитвами преподобнаго Зосимы, //
Избавителю, и нас спаси.

И ныне, Богородичен, глас тойже:

О, чудесе новаго, всех древних чудес! / Кто бо
позна Матерь, без мужа рождшую / и на руку
носящую всю тварь Содержащаго? / Божие есть
изволение Рождшееся. / Егоже яко Младенца,
Пречистая, / Твоима рукама носившая / и
матерне дерзновение к Нему имущая, / не

престай молящи о чтущих Тя, / ущедрити и спасти души наша.

Тропарь, глас 8:

Любовию Христовою уязвился еси, преподобне, / вся красная мира сего отринув; / подвигом безмолвия подвизаяся, добродетели божественныя стяжал еси; / премудрости Божия причастниче, отче наш Зосимо, // моли Христа Бога и Пречистую Богородицу спастися душам нашим.

Слава, и ныне, Богородичен, глас тойже:

Иже нас ради рождейся от Девы / и распятие претерпев, Благий, / испровергий смертью смерть / и Воскресение явлей яко Бог, / не презри, яже создал еси рукою Твоею, / яви человеколюбие Твое, Милостиве, / прими рождшую тя Богородицу, молящуюся за ны, // и спаси, Спасе наш, люди отчаянныя.

На велицей вечерни

На Господи, возвах: стихиры на 8, глас 8:

Отче преподобне Зосимо, / сердце умиленно и ум кроток от юности стяжал еси, / вперив ум к Богу и крест твой восприемь, / во обитель спасающихся устремился еси, / тело твое подвиги воздержания Духу Божию покорил еси, // моли спастися душам нашим.

Отче преподобне Зосимо, / в пустыни
Рославльской старца Василиска обрет / тому
всецело любовь преданся еси, / и стопам
преподобнаго последуя, / яко бесплотен на
земли пожил еси, // темже ты верою вси
ублажаем.

Отче преподобне Зосимо, / обитель пустынную
Коневскую возлюбив / и тамо труды твоя со
усердием и любовь полагая, / слезами теплыми
душу твою очистил еси, / темже молися
Господеви // помиловатися душам нашим.

Отче преподобне Зосимо, / будущия ради жизни
при Томи реце вселился еси, / никакоже бояся
невидимыя враги, / многожды скорби творящия
тебе, / смирением же и терпением вооружился
еси. // Темже ты верою вси чтим и ублажаем.

Отче преподобне Зосимо, / все житие
препровождаше в безмолвии мнозе и плаче, /
инок быв истинен верою, / нестяжанием
украшен и воздержанием удобрен. / Яко
странен и пришлец на земли был еси. // Темже
Небесных благих наслаждение обрел еси
досточудне.

Постнических воистину подвигов благовонный
сосуде: / плоти попраля еси долу влекущее
мудрование, / добродетельми же душу
просветил еси / и к Божественному вперился
еси желанию. / Темже прехвальне Зосимо, //

Христу Богу молися // даровати душам нашим мир и велию милость.

Узким и тесным путем от земли в славу
Небесную шествовав / многим подвигом и
скорбем, любви ради Божия, предавался еси, /
тем ныне Владычню Престолу предстоя, /
наслаждаешься Того светлостей, / и нам убо,
светло твою память чтущим, / молитвами
твоими подаждь Божественных причастие // и
вечныя радости приятие, Зосимо преподобне.

Явился еси, преподобне отче, / лествица
высокая добродетели духовныя, / благодати
восход, / по ней же восшед, святе, / зриши
славу Божию, и святых Ангел Небесных
ликостояния светлости, / и, гласов боголепных
пений наслаждаяся, / с ними поеши, веселяся
радостно, / Богоносе Зосимо, / Христу Богу
молися // даровати душам нашим велию
милость.

Слава, глас 4:

Сердце умиленно стяжав, / житию и подвигом
пустынным прилепился еси. / Постом, бдением,
злостраданием и еже на земли леганием /
чистоту имея душевную и телесную, и память
смертную, / был еси чадо Христова смиренно и
разумно // в духовном житии твоём. /
Преподобне отче наш Зосимо, // моли спастися
душам нашим.

И ныне, Богородичен, глас тойже:

Иже Тебе ради богоотец пророк Давид, /
песненно о Тебе провозгласи, / величая Тебе
Сотворшему: / предста Царица одесную Тебе. /
Тя бо Матерь, Ходатаицу Живота показа, / без
отца из Тебе вочеловечится благоволивый Бог,
/ да Свой паки обновит образ, истлевший
страстьми, / и, заблуждшее горохищное обрет
овча, / на рамо восприим, ко Отцу принесет и
Своему хотению, / с Небесными совокупит
Силами, / и спасет, Богородице, мир //
Христос, имеяй велию и богатую милость.

Вход. Прокимен дне. И чтения.

Премудрости Соломоновы чтение (главы 5 и 6):

Праведницы во веки живут, и в Господе мзда
их, и попечение их у Вышняго. Сего ради
приимут Царствие благолепия и венец доброты
от руки Господни, зане десницею покрывает я и
мышцею защитит их. Приимет всеоружие
рвение свое и вооружит тварь в месть врагом.
Облечется в броня правды и возложит шлем —
суд нелицемерен. Приимет щит непобедимый —
преподобие, поострит же напрасный гнев во
оружие, споборет же с ним мир на безумных.
Пойдут праволучныя стрелы молниины и, яко от
благокругла лука облаков, на намерение полетят.

И от каменометных ярости исполнь падут грады. Вознегодует на них вода морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навикните, судии концев земли. Внушите, держащий множества и гордящийся о народех язык. Яко дана есть от Господа держава вам и сила от Вышняго.

Премудрости Соломоновы чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие — сокрушение, они же суть в мире. Ибо, пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющийся Нань разумеют истину и вернии в любви пребудут

Ему, яко благодать и милость в преподобных Его и посещение во избранных Его.

Премудрости Соломоновы чтение (глава 4):

Праведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости — житие нескверное. Благоугоден Богу быв, возлюблен бысть, и живой посреде грешник преставлен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Люди же видевше и не разумевше, ниже положше в помышлении таковое, яко благодать и милость в преподобных Его и посещение во избранных Его.

На литии стихиры, глас 3:

О велия славы жития твоего, отче наш Зосимо: /
вся бо земная оставив, единого Христа возлюбил еси / и, Тому служа чистою совестью, / на земли ангельски пожил еси. / Бесовская же коварства разорив, / возшел еси на высоту добродетелей. / Блажен еси, тако Христу работав, / темже и мы,

в зеркале жития твоего путь к Животу зряще, //
тя непрестанно ублажаем.

Глас 8:

Явился еси раб Богу угоден в шествии твоём
духовном, / во смирении многом и послушании.
/ Сего ради устрои Господь душу твою
смиренномудрую // во стезях Его.

Глас 6:

Молися прилежно за ны, преподобне отче
Зосимо, / избавление подати от всех бед,
находящих на ны. / Ускори, святе, на помощь
нашу / и, ныне в Вышних Богови предстоя, //
поминай чтущих память твою.

Слава, глас 8:

Приидите, стецытеся, иночестии собори
боголюбивии, / к божественной памяти отца
нашего Зосимы. / Поучився во дни и в нощи в
заповедех Господних, / сподобился еси обрести
лествицу Небесную, / по нейже возшед, достиже
горняго Иерусалима / и, от болезней и трудов
достойну почестъ приемля, / со Ангельскими
лики ныне радуется, / и божественнаго зрения
наслаждается Единосущныя Троицы. / Темже и
нас поминай, отче Зосимо, // предстоя у
Престола всех Царя Христа и Бога нашего.

И ныне, Богородичен:

Владычице, прими / молитвы раб Твоих / и
избави нас // от всякия нужды и печали.

На стиховне стихиры, глас 2:

От юности святоотеческому житию поревновав
во всем, / преподобне отче Зосимо, / оставил
еси вся, яже в мире, житейская мудрования, //
моли о нас Человеколюбца Господа.

Стих: Честна пред Господем / смерть
преподобных Его.

Отчий пример пред собою имея, / в
добродетелех иноческих путь свой устроил еси, /
яко злато в горниле искушено явивыйся, //
приятелище Духа Пресвятаго был еси.

Стих: Блажен муж бояйся Господа, / в заповедех
Его восхощет зело.

Послушание совершая, / на остров Коневец
пришел еси, / слезами путь свой омочив. / И
тамо во обители от наставник добре поучаяся, /
монашества обеты Богу дал еси, / всякия
добродетели исправляя, // тем же ты вси
почитаем.

Слава, глас 8:

Инокинь множества / наставника ты почитаем,
отче наш Зосимо, / Ангелов собеседниче и
преподобных сопричастниче, / с ними же
молися Господеви // помиловатися душам
нашим.

И ныне, Богородичен, глас тойже:

Безвестная Дево, / яже Бога неизреченно
заченши плотию, / Мати Бога Вышняго, / Твоих

рабов мольбы приими, Всенепорочная, / всем подаючи очищение прегрешений, / ныне наша моления приемлющи, // моли спастися всем нам.

**На благословение хлебов тропарь преподобному
дважды,
и Богородице Дево: единожды.**

Тропарь, глас 8:

Любовию Христовою уязвился еси, преподобне,
/ вся красная мира сего отринув; / подвигом
безмолвия подвизаяся, добродетели
божественныя стяжал еси; / премудрости Божия
причастниче, отче наш Зосимо, // моли Христа
Бога и Пречистую Богородицу спастися душам
нашим.

На утрени

**На Бог Господь: тропарь преподобнаго дважды.
Слава, и ныне: Богородичен: Иже нас ради:**

По 1-й кафизме седален, глас 4:

Послушание учителю своему воздавая, / к Богу
приблизился еси. / Ни зной, ниже мраз, ниже
страхования демонская, / ничтоже возможно
уклонити тя, преподобне, от Любве Божия. /
Темже о всех нас Христа Бога моли, / в песнех,
преподобне Зосимо, // твою память
почитающих.

Слава, и ныне, Богородичен, глас тойже:
Дево Всенепорочная, / яже Пресущнаго Бога
рождшая, / со преподобным Зосимою Того
непрестанно моли, / оставление прегрешений и
исправление жития дати нам, // прежде конца
верою и любовью поющим Тя по долгу, Едина
Всепетая.

По 2-й кафизме седален, глас 8:

От младенчества яко светильник воссиял еси,
преподобне Зосимо. / Воздержанием плотския
страсти умертвив, / на высоту Богоразумия
восшел еси. / Сего ради вопием ти: // моли о
чтущих память твою.

Слава, и ныне, Богородичен, глас тойже:
Се Тебе роди родов славят, / якоже прорекла
еси Отроковице: / Создателя бо всех была еси
Палата и Божественный Храм, / в Немже
вселися Вышний, // и плотию обложися, да
спасет нас.

Величание:

Ублажаем Тя, / преподобне отче наш, Зосимо, /
и чтим святую память твою, / наставниче
монахов / и собеседниче ангелов.

Псалом избранный: Терпя потерпех Господа:

По полиелеи седален, глас 8:

Премудрости Божественной измлада навик, /
вся в мире суетная возненавидев, преподобне
Зосимо, / Христа же единого возлюбил еси. /
Духовному же отцу всеконечне в послушание
вдався, / многих добродетелей сокровищем от
того обогатился еси. / С ним же молися
Господеви, Зосимо преподобне, / грехов
прощение даровати // чтущим любовь святую
память твою.

Слава, и ныне, Богородичен, глас тойже:

Яко Всенепорочная Невесто Творца, / яко
Неискусомужная Мати Избавителя, /
Приятелище яко сущи Утешителя, Всепетая, /
беззаконию мя суща скверное обиталище / и
демоном игралище в разуме бывша, / потщися
от тех злодействия мя избавити / и светло
жилище добродетелей соверши, Светоносная,
Нетленная, / отжени облак страстей и Вышняго
причастия сподоби / и Света невечерняго
молитвами Твоими.

Степенна, 1-й антифон 4-го гласа.

Прокимен, глас 4: Честна пред Господем смерть
преподобных Его. **Стих:** Что воздам Господеви о
всех, яже воздаде ми?

Евангелие от Матфея, зачало 43.

По 50-м псалме стихира, глас 6:

Егда прииде с Коневца преподобный Зосима / с
сотаинником Василиском в пустыню
Сибирскую, / тогда на Твою помощь,
Богородице, упование свое возложи. / Егда же
прииде в землю Московскую, / тамо обитель во
имя Живоначальныя Троицы и иконы Твоея
Одигитрии возгради, / сию подвигами дев
Христовых прославив. / Мы же, его любви к
Тебе подражающе, / Тя немолчными пении
ублажаем / и, чудотворному образу Твоему
поклоняющися, зовем: / О, Пресвятая, //
прииди и сохрани достояние Твое от всякаго
зла.

**Канон Богородице на 6; и преподобному Зосиме,
на 8.**

Канон преподобному Зосиме, глас 4.

Песнь 1.

Ирмос: Трискаты крепким, / Рождейся от Девы,
/ безстрастия во глубине / души тричастное
потопи, молюся, / да Тебе, яко в тимпане, / во
умершвлении телесе // победное воспою пение.

Слове Божий, молю Ти ся: / даждь ми слово и
отверзи ми устне, недостойному рабу, / да
восхваляю угодника Твоего, преподобнаго отца
Зосиму, // яко в Тебе и Тобою прославися.

Отче преподобне Зосимо, / прими от нас

недостойных песнь сию, юже воспоим с
любовию, / и моли за ны, грешныя рабы твоя, /
от усердия дерзнувших восхвалити житие твое,
// тя бо Христос прослави.

Днесь сошедшеся в пречестный храм сей /
восхвалим Божия угодника память, // яко
славно о Имени Христа Господа своего
прославися.

Приими, преблаженне, отче досточудный
Зосимо, / пение сие похвальное / и твое
отеческое покажи о нас милование. / Превыше
бо сил наших по достоинству похвалити тя, //
но елико мощно, от усердия дерзаем.

Инок множества / наставника тя чтим, отче
наш Зосимо, / тобою бо путь суций правый
шествовати познахом, / блажен еси, Христови
работав, / и вражию обличил еси силу, / Ангелов
собеседниче и преподобным сопричастниче и
праведным, / с нимиже молися Господеви //
помиловатися душам нашим.

Богородичен: Аще много может молитва
праведнаго поспешествуема, / Ты, святейши
суци всея твари, яко Мати Богу, несравненно
большая можеша. / Призри на ны с
преподобным Зосимою // и испроси нам вся
благая от Бога.

Катавасия: Отверзу уста моя:

Песнь 3.

Ирмос: С высоты снишел еси волею на землю /
превышше всякого начала / и смиренное
вознесл еси / из ада преисподняго / естество
человеческое, // несть бо свят, паче Тебе,
Человеколюбче.

Стягнув тело твое воздержанием и чистотою, /
уединение в дебрех Коневских обретая, / душу к
Богу возводити тщался еси, преподобне, / ив
Вышняя селения, отче Зосимо, достигл еси. /
Ныне же на Небесех со Ангелы ликуя, / о нас
Христу Богу молися // даровати нам велию
милость.

Послушание старцу твоему являя, / от силы в
силу восходил еси, / заповеди и учения
наставника преподобнаго Василиска
восприемля, Зосимо преподобне. / Ныне же с
ним предстоя у Престола Вседержителя, / о нас
Христу Богу молися // даровати нам велию
милость.

Вся заповеданная тебе исполняя, / путем
спасительным шествовал еси, отче наш Зосимо,
/ всегда любовь велию ко старцу своему
сохраняя, / жизнь иноческую совершал еси, /
удручая тело свое постом, и бдением и труды, //
в молитвах же ум свой возводил еси к
Небесному Царствию.

Двоицу отец, Зосиму и Василиска, приводим

Тебе в молитву Христе Боже, / ихже моление
приемь и от вражия нас коварства сохраняя, //
Духом Твоим Святым настави нас во веки Тя
величати.

Радуйся, преподобне Зосимо, / радость бо
Небесную вечную / от Бога приял еси за труды
твоя, / молися с Богородицею // о мире и людех
согрешающих.

Богородичен: Крепость и силу обретающе в
помощи Богоматере, / преподобнии отцы
Зосима и Василиск путь свой совершаху. / Ты
же Мати Божия Всемиловитая кров крепок во
испытаниих уготовала еси // преподобным
рабом Твоим.

Седален, глас 8:

От юности, блаженне, вся оставль житейская,
красная же и лепотная, / усердно последовал
еси Христу, призвавшему тя, преподобне, /
духовному наставнику покорився. / Темже тя
Господь добре устрояет пастыря Своим овцам
словесным, отче Зосимо. / Моли Христа Бога
грехов оставление подати // чтущим любовь
святую память твою.

Слава, и ныне, Богородичен:

Просвети, Чистая, сетующая сердца наша, /
присно преступленьми и житейскими многими
молвами оскверняемая, / и не остави нас

погибающих, // яко да прославим и любовь
воспоим Тя, Всепетая.

Песнь 4.

Ирмос: Услышах слух Твой и убояхся, / разумех
дела Твоя // и ужасохся, Господи.

Шествие в страну сибирскую с трудом велиим
совершили есте, / о многотруднии старцы
Зосимо и Василисче, / послушание воле Божией
исполняюще. / Множество страданий
претерпевше / и жизни сохранение милостию
Божиею улучивше, // бысте чада Богу
возлюбленная.

О двоице присноблаженная, преподобнии
Зосимо и Василисче, / яко едино блаженство
имуций от Бога, / теплым предстательством
вашим // от всех лютых спасайте призывающих
вас.

Уединение в дебрех сибирских обретая, / вся
содеянная с плачем духовному отцу исповедая, /
раб верный Богу и монах явился еси, отче
Зосимо, / труды и подвиги твоими всех удивляя
// и ко спасению наставляя.

Потщався тленными нетленная стяжати,
преподобне Зосимо, / Христа единого приобрел
еси. / Душу к Богу возводити тщася, / радости
вечныя сподобился еси. / Христа моли спастися
всем, // любовь священную память твою

почитающим.

Иже Свет миру, Христе, / святыя Твоя
просветивый солнца светлейше, / молитвами
преподобнаго Зосимы и наши сердца освети //
светом благодати Твоея.

Богородичен: Мати Божия Благословенная, /
помощь и руководство рабом Твоим. /
Окормление душам тихим, / Богу присвоенным
и в подвиге иночестем житие провождающим,
// даровала еси, Пренепорочная.

Песнь 5.

Ирмос: Ныне встану, пророчески рече Бог, /
ныне прославлюся, ныне вознесуся, / падшаго
прием от Девы // и к свету умному возносяй
Моего Божества.

Вещь дивная явися преподобному Василиску
молитва Иисусова, / о нейже послушнику
своему Зосиме поведал есть. / Тогда позна
преподобный Зосима тайный подвиг старца
своего, // молитвы Иисусовой делание.

Даде Господь помощь Свою Зосиме
преподобному, / еже уразумети силу молитвы
старца своего, / и записал преподобный Зосима
откровения путей и степеней / славнаго дара,
старцу Василиску дарованнаго, // на утешение
и осмысление всем дерзающим рабом
Господним.

Ни лютость врагов духовных, ниже скудость пустыни / расслабиша терпения вашего, преподобнии Зосимо и Василисче. Многия дни и часы в молитве Иисусовой подвизающесе, / яко адаманты тверды, пребыли есте, // ревностию Божественною распаляеми.

Уведано бысть православными житие старцев духовное, / и спасающийся под кров сих прибегаху, / подражающе им в молитвах, пощениих и бдениих, // ко Христу Человеколюбцу.

Собрал еси, отче Зосимо, в души твоей Божественныя плоды Духа: / непрестанну молитву, чистоту душевную же и телесную / и бдение твердо, смирение нелицемерно, // имиже храм показался еси Бога Вседержителя.

Богородичен: Богородице Пречистая, / Твоего Сына и Бога видети желая, / Зосима, угодник Твой, / Сего живоносным и Божественным стопам // невозвратно последова.

Песнь 6.

Ирмос: Приидох во глубины морския, / и потопила мя есть буря многих грехов, / но яко Бог из глубины возведи живот мой, // Многомилостиве.

Житейскаго, блаженне Зосимо, убежав волнения, / в тишину дошед Божия покоя, /

молися подати и нам // о Христе того наслаждения.

Душу очистив, преподобне, страстей омрачения / сугубым постом и молитвою непрестанною, / зеркало, отче, был еси Божественного Духа, // светильниче монахов, Зосимо Богоносе.

Ты убо, преподобне отче, хотел еси утаиться от человек и един Единому Богу безмолвствовать. / Он же не остави тебе неведома быти, / но всем, требующим спасения, / яве показа ты, житие твое добродетельное, // на пользу хотящим стопам твоим последовати.

Святая Троицы дом, Зосимо, показался еси, / Еяже силою священныя создал еси обители, преподобне, / на устроение спасительное монашествующих, / чествующих память твою святую, // приснопамятне.

Земная и мимотекущая, яко уметы, вменив, / Христа единого вождедел еси, / к Нему же союзом любви приблизив душу свою, // Того обрести потщался еси ненасыщаемыя доброты.

Богородичен: Мати Божия Пречистая, / присных рабов Твоих скорби утоляеши и наставляеши // воли Божией следовати.

Кондак преподобнаго, глас 6:

Избранниче Божий и старче премудрый, / наставниче наш Зосимо, / от юности

постническою стезею шедый, / во одежду кротости и терпения облеклся еси; / тем же дар Святаго Духа улучив, / многия души Христу уневестил еси, / и обители святыя утвердил еси. / Ныне же в сонме преподобных на небесех ликуеши, // моляся непрестанно о чтущих святую память твою.

Икос:

Услышав Христов Евангельский глас, / оставив плотская мудрования, / богатство и славу мира сего, яко прах, вменив, / последовал еси наставнику своему / и от того всякия добродетели навик, / и бысть ему ученик добрым послушанием, / Бесплотных ликостоянию сочетався. / Подаждь разум и мне, недостойному рабу своему. / Дерзаю на твое милосердие и вопию сице: / радуйся, преподобных всех похвало; / радуйся, постников подражателю и пустыни устроителю; / радуйся, яко в ней тобою Бог славится; / радуйся, добре пасый стадо твое; / радуйся, яко смирил еси злоначальнаго врага; / радуйся, яко посрамил еси бесов полки; / радуйся, монашествующих светильниче пресветлый и столпе терпения; / радуйся, яко собрал еси инокинь множество во спасение; / радуйся, яко тобою хвалимся вси; / радуйся, яко тебе ради

избавляемся от бед; // радуйся, отче Зосимо
преподобне.

Песнь 7.

Ирмос: Юноши три в Вавилоне, / веление
мучителево на буйство преложше, / посреде
пламене вопияху: / благословен еси, Господи, //
Более отец наших.

Истиннаго и кроткаго Пастыреначальника
Христа / незлобное овча, отче Зосимо, был еси,
/ смирением и терпением победив бесы
лукавыя. / Темже хотящим тебе озлобити кроток
явился еси, / Христу вопия: // Благословен Бог
отец наших.

Глаголы разумев гонителей злочестивых, /
Христа Бога силою / мучители немощны
сотворил еси. / Тако и страсти побеждая, /
пребыл еси, поя: // Благословен Бог отец наших.

Многи скорби душевныя и гонения прияв, отче
Зосимо, / сибирскую землю покинул еси, / и во
град Москву со ученицами верными устремился
еси, присно молитву творя: // Благословен Бог
отец наших.

Лукавых духов тьму разгнал еси / и, собрав
монашествующих множества, / пастырь их был
еси и светильник светлейший, преподобне
Зосимо. / И ныне поем с тобою: // Благословен
Бог отец наших.

Поношение врагов, велеречие ненавидящих, / озлобление же и клятва их и сим подобная злая воздвигахуся на тя. / Но от всех сих избави тя Господь, / яко непорочен был еси в пути, ходив в законе Его. / Тем, ублажив тя, Праведный Судия // о нас молитвенника содела, преподобне Зосимо.

Богородичен: Милостива ми Судию, Сына Твоего, / Богородице Дево, Твоими молитвами быти в день Суда, / Мати, умоли: // на Тя бо едину надежду мою возлагаю.

Песнь 8.

Ирмос: Избавителю всех, Всесильне, / посреде пламене благочествовавшия, / снизшед, оросил еси / и научил еси пети: // вся дела благословите, пойте Господа.

Всем сердцем, Зосимо, Троице усердно служив / и, от Нея луча благодать приемь, / световиден соделался еси. Ныне же со Ангелы ликуеши, // поя и превознося Христа во вся веки.

Храм Троице Пребожественней душу и тело совершив, / Божественныя создал еси обители, достославный Зосимо, / в нихже лики девствующи и монашествующи чины собрал еси, // поющия согласно и превозносящия Христа во вся веки.

Заступник и покровитель граду Москве, /

Святитель Божий Филарет, / молитву и
милосердия бездну простре и на твоих сирот, /
преблаженне Зосимо, // поющих и
превозносящих Христа во вся веки.

Вся потребная к строению обители будущия
уготовляя, / келлии соградив и кладезь ископав,
начало монастырю положил еси. / Вся яже к
монашескому житию полезная написуя, /
укрепил еси учениц твоих, // превозносящих
Христа во веки.

В пристанище тихое вшед, богомудре Зосимо, /
житейских плаваний отбегл еси. / Темже
волнуемым в бури страшней // спасительное
окормление был еси.

Богородичен: Богородительнице Пречистая,
рабов Твоих сирых прияла еси, / кров новый
тем в пределах Московских указующи, / покров
и утверждение обители Твоея, Одигитрие,
устраивающа, // к жизни вечной
монашествующих путеводствуеши.

Песнь 9.

Ирмос: Ева убо недугом преслушания / клятву
вселила есть; / Ты же, Дево Богородице, /
прозябением чревоношения миру
Благословение процвела еси. // Тем Тя еси
величаем.

Священно и красно жилище для сирых девиц и

вдовиц / создал еси, преподобне отче Зосимо, /
наставляя их послушанию и смирению; / темже
к ревности ангельскаго жития подвигл еси //
множество иночествующих.

Вперяся умом вослед Господу, / чин схимы
великия от пустынных отцев приял еси,
богоблаженне отче. / Аще и зашел еси от нас во
гроб, / уснув сном смерти, / обаче в
воскрешение праведных просветишися, яко
солнце, // в Царствии Отца Небеснаго.

Аще земное отечество, преподобне Зосимо,
оставил еси, / но в Отечество Небесное возшед,
/ во обители Одигитрии множество
монашествующих собрал еси. // Темже со
дерзновением, отче, молися Христу Богу за ны,
рабы твоя.

Днесь воссия нам честная память твоя, /
преблаженне отче наш Зосимо. / И красуется
обитель, в нейже подвиги своя и труды скончал
еси, // и победы венцы восприял еси.

Преподобне отче наш Зосимо, / потщися нас,
чад своих, чисты представить Господеви, /
Егоже со Пресвятою Богородицею вкупе и со
всеми святыми прилежно моли, всеблаженне, /
православному народу нашему подати здравие и
всем верным спасение, // очищение грехов и
велию милость.

Богородичен: Воистину сей есть святой день, /

в онъже собра нас Мати Божия / прославити подвиги преподобнаго отца Зосимы, zde просиявшаго, // егоже память пребывает во веки.

Светилен преподобнаго Зосимы:

Мирское пристрастие оставль и богатство мимотекущее, / душу Христу предав, Зосимо преблаженне, / учитель многих душ явился еси / и, к Богу отходя, // путь жития и спасения сим указал еси.

Слава и ныне, Богородичен:

Тя песньми немолчными ублажаем, Дево, / яко от Троицы Единого родила еси, Богородице, / и носиши на Божественную руку Пребогатое Слово / непременно и неизменно.

На хвалитех стихиры преподобнаго, глас 2:

Все упование ко Господу возложь, / всем сердечным желанием горя к Богу, преподобне Зосимо, / яко звезда светлая на востоце, / всем возсиял еси, святе. / Возрадуйтесь и возвеселитесь, монахов сонми, / торжествующе в памяти его. / Ты же, преподобне, Христу Богу // со дерзновением молися о душах наших. Дарова тебе, отче Зосимо, / Господь наставника духовнаго, / и от того премирному житию научаемь, / жизнь Богови посвятити возжелал еси. / Сего ради стезею безмолвническою в

Небесное Царство шествовав, / Господа Спаса славословил еси; // Емуже со дерзновением молися о душах наших.

Смирен, кроток и молчалив быв отче Зосимо, / чист сердцем показался еси, / храм Божий явился еси по достоянию, / яже от Него прибывшая тебе дарования // милостиво подавая нам.

На Небесех ныне со Ангелы водворяяся / во свете Присносущныя Троицы, / отче Зосимо, / о нас молися Человеколюбцу Богу, // сохранитися нам от сети лукаваго.

Слава, глас тойже:

Чистый сосуд Святаго Духа показался еси, / озаряемь Божественною светлостию, / и ныне на Небесех Христа зриши лицом к лицу, / моли Его, отче Зосимо, // о совершающих память твою верно.

И ныне, Богородичен, глас тойже:

Все упование мое / на Тя возлагаю, Мати Божия, // сохрани мя под кровом Твоим.

Славословие великое и отпуст.

На Литургии

Блаженны от канона песни 3-я и 6-я.

Прокимен, глас 7: Честна пред Господем / смерть преподобных Его.

Стих: Что воздам Господеви о всех, яже воздаде ми.

Апостол к Галатам, зачало 213.

Аллилуя, глас 6: Блажен муж, бояйся Господа, / в заповедех Его восхощет зело.

Стих: Сильно на земли будет семя его.

Евангелие от Луки, зачало 24.

Причастен: В память вечную будет праведник, от слуха зла не убоится.

